

四庫全書

史部

欽定四庫全書

史部

欽定日下舊聞考卷六十五

詳校官庶吉士臣胡鉉

檢討臣德生覆勘

總校官進士臣程嘉謨

校對官中書目葉元符

謄錄監生臣汪人瑞

欽定四庫全書

欽定日下舊聞考卷六十五

官署

四

原光祿寺署在皇城東華門內初為宣徽院尚食尚醴

二局繼改光祿寺其屬四署曰大官曰珍羞曰良醖曰

掌醢而司牲司牧二局隸焉

春明夢餘錄

原在宮室門今移改

臣等謹案光祿寺署在東安門內橋之右春明夢

餘錄謂在東華門內者蓋東安門俗亦稱外東華

門也

原光祿寺大門內左為茶葉庫月進房右為錢鈔庫月進房北為儀門中為均節堂堂左為典簿廳堂後有川廊北為後堂川廊傍左為欽錄廳右為小軒後堂北為庫樓堂之左為和衷堂堂之右有銀庫良醞署大官署俱在寺之東偏鵞池鵞倉在其後掌醞署珍羞署俱在寺之西偏後有天鵞池鹽庫庫後空地象骨座焉

明光祿寺志

原光祿寺大烹門在東安門橋右東上門左東入門為

如水軒南向又東為瓊廡堂西入門為四星堂東向北
為下門入門為涼樓左右皆有井亭東西各有倉房樓
後有川廊左鮮房右坐家房再北為皇竈東夾道有黃
帳房倉無錫米倉土地祠尚膳庫熬凍房上下雞房煮
筭房西夾道有內器四庫和羹堂尚膳庫宰牲蒸作房
香薰房

同上二條原在
宮室門今移改

增光祿寺在

皇城東安門內設卿滿漢各一少卿滿漢各一大官珍

姜良醞掌醞四署司庫典簿附焉

大清一統志

臣等謹案光祿寺堂額曰敬慎有節前列

訓辭曰禮始諸飲食古聖人制節謹度克勤小物雖盤
盂必有箴銘可弗敬諸

世宗御筆也寺署堂五楹露臺一左典簿右鹽庫大官
良醞署在東珍羞掌醞署在西餘若黃冊房督催
所爇食房俱在北酒局在西安門舊制惟漢少卿
二缺又有漢寺丞一康熙三十八年裁漢少卿一

及寺丞自乾隆十三年以後皆

特簡大臣總理寺事

原明宣宗光祿寺箴 周官膳庖實肇光祿漢列九卿
唐總四屬國朝建置置率循勿易享祀賓燕咸其所職先
王之禮豐儉有宜惟敬惟誠儀式行之繁盛必備攝牲
必潔執事有恪儼乎對越羣賢在朝四裔會同廩之餼
之必精必豐朝夕膳羞必謹恒度毋儉公費而縱私餽
毋騁奢侈毋肆暴殄毋作愆過以蹈常典正已率下咸
敬慎之用永終譽
光我訓辭 官箴

原槽房俱南向凡七層其南為御酒房長春房採四時
花釀酒處也苦酒房造貞一酒處也白酒房嵌長春房

內俱內官司之

明光祿寺志

原光祿寺有鐵力木酒榨相傳籍沒沈萬三家物每榨用米二十石得汁百甕又工部有銅匱四一在節慎庫高可過人亦傳是沈萬三家物

耳護

補光祿寺酒榨長三丈形如方匣朱紅漆容米六十石

暖妹由筆

原張元易於光祿寺署中種竹甚蕃黎惟敬秘書題曰

紫禁滄洲

幾丈人集

以上五條原在宮室門今移改

臣等謹案工部銅匱已無可考今光祿寺酒局榨六座雜木為之舊所稱鐵力木者無存至種竹遺蹤亦久湮矣

原京師諸祭皆領於祠官惟壩上馬房別自建祠以元旦冬至聖節遣內侍主祭光祿寺具品物不領於祠官

湯幢 原在京畿
小品 門今移改

臣等謹案以上各條叙光祿寺

原太僕寺在萬寶坊主簿廳附焉

明一統志

原太僕寺在皇城西乃元兵部舊署

春明夢錄

以上二條原在

城門
今移改

增太僕寺在正陽門內東中心臺設卿滿漢各一少卿

滿漢各一員外郎主事各四主簿廳附焉

大清一統志

臣等謹案太僕寺堂額曰勤字天育前列

訓辭曰古之太僕左馭前驅車馬是供厥後因沿其制

天育雲屯資牧字焉尚克勤修乃職

世宗御筆也

又按太僕寺堂三楹東有當月印房土地祠文昌閣西有主簿廳茶房

國初無專署惟分兵部武庫司廨舍六間為辦事之所
亦無兼管大臣雍正三年始建官署乾隆四十四
年

特命大臣總理寺事

原太僕寺每年祭馬神在通州北四十里安德鄉鄭村壩春祭在二月二十二日秋祭在八月二十八日前期

題請遣少卿一員行禮

同政要覽

原在京畿門今移改

臣等謹案春秋祠馬神明制屬於太僕今制改歸

上駟院奉行矣

補永樂十三年二月甲申北京立馬神祠時行太僕寺卿楊砥請立馬神祠于蓮花池上命翰林院考古今儀式翰林院言古者春祭馬祖夏祭先牧秋祭馬社冬祭馬步之神國朝南京止祭司馬之神每歲春秋用豕一羊一帛一於是命北京馬神祠設馬祖等神及司馬之神五位每位用羊豕帛各一儀制准南京

原明宣宗太僕寺箴軍國所用馬為之最軍國之政馬政亦大肆予慎之有敕如雲既充內閑亦渙其羣疇願庶民析之畜牧司其政令命汝太僕政令攸宜閱省以時不愆不忘乃蕃乃滋蚩蚩之毗國家之本此既卓

豐馬息斯奮爾篤于民毋侵毋剋爾勤于職必敬乃
德魯僖無邪衛文塞淵爾師古人厥功懋焉 官箴

以上二條原在

城市門今移改

原王鑒重建馬神廟記 通州地高寒平遠泉甘草豐
彌望千里太宗詔作馬神廟在州之北地曰壩上鄉曰
安德旁為御馬苑凡二十所弘治九年三月重葺十年
二月告成銘曰兢兢國馬於甸之埜散馬如雲駢馬如
雨有廟言言在路之陽始維作之自我文皇有崇其祀
其自今始神始降祥人惟致喜昔在衛文亦有魯僖心
維塞淵思亦無期功以才興亦以情 原在京畿
毀琢石鏡辭爰告求模 王文恪集 門今移改

原太僕寺石刻畫馬二一史道碩畫一趙孟頫畫皆王

世貞官太僕時所摹勒也道碩五代時人

玉堂舊記

原在城門今移改

欽定四庫全書

欽定四庫全書
欽定日下舊聞考

六

臣等謹按兵部夾道今仍稱太僕寺衙衙即舊署址也石刻已淪沒不可考

又按以上各條叙太僕寺

原順天府治即元大都路總治舊署也先是遼升為京立幽都府又改為析津府至今為大興府元初為大都路號大興府官署為宗正所據官吏辦事佛寺中至大中監路平章政事莫吉奏請以錢四萬二千五百緡買靈椿里周氏地計十九畝建為公署永樂定鼎於此遂

因其署而為順天府

春明夢餘錄

原順天府附郭二縣東曰大興西曰宛平府境南
為固安霸州北為昌平東為通州三河香河玉田
西為良鄉房山東北為薊州東南為武清西南
為涿州固安之東為東安永清霸州之南為保
定文安大成昌平之東為懷柔密雲通州之北
為順義南為潮縣東南為寶坻薊州之北為平
谷東為豐潤東北為遵化 國初既設北平布

政使司因以北平名府永樂中以北平為行在所改府

曰順天

長安客話

原順天府東至永平府五百二十里南至河間府四百
十里西至保定府易州二百十四里北至延慶州百七
十里東南至天津衛三百三十里西南至保定府三百
三十里西北至萬全都指揮司三百五十里東北至古
北口二百四十里

方輿紀要

原易言湯武革命順乎天而應乎人文皇龍興於此因

以自命云

名勝志

以上四條原在
城市門今移改

增順天府府尹一人府丞一人治中一人通判經歷照磨各一所屬宛平大興二縣康熙十五年以昌平良鄉等十九州縣隸焉自雍正元年以後皆奉

特簡大臣兼理府事

大清會典

增順天府在地安門外鼓樓東即元大都路總治舊署明為順天府

本朝因之

大清一統志

增順天府尹署南嚮門三重堂五楹堂後為內宅宅西北為演耕所大門內東為土穀祠西為包公祠土穀祠後折而東北為府丞署治中署在堂後內宅門東通判署在大門內東隅經歷署在西隅其西北為照磨署北為司獄署

順天府冊

臣等謹按順天府堂額曰肅清畿甸前列

訓辭曰畿甸首善之區必政肅風清乃可使四方觀化
非剛正廉明者曷克勝任

世宗御筆也

原順天府府尹府丞題名記工部尚書豐城雷禮文也
嘉靖三十九年立寮佐題名碑記二一為禮部左侍郎
鉛山費家撰嘉靖二十二年立一為順天府通判晉江
張問仁撰萬曆十三年立

函山 原在城市
旅話 門今移改

臣等謹案順天府署有元大都路碑在堂左元劉
廉書字畫完好巋然獨存餘俱無考

原天星堂在順天府後內空洞上覆以格有郡國方位

圖冬至日懸毛羽驗氣之盛則其歲豐

耳談

原順天府治後東北隅有候氣室冬至日以葭管吹灰

候之申時行有重修候氣室記

燕都遊覽志

補順天府中有候氣室在東夾道迤北立春日欽天監

官于堂下掘地為坎深數尺以竹管八竇灰其中照方

位布列坎內以上覆之至冬至日啓視以占八方之豐

歉若管灰全浮出者為豐不浮者為歉即漢書葭管灰

實律管之法也

挑燈集異

以上三條原在
城市門今移改

臣等謹案天星堂候氣室遺址無考其候氣之法近已不行惟立春前一日府尹率僚屬迎春及立春日恭進春山因擊土牛勸耕如舊儀又恭過每歲

聖駕耕藉尹率其屬襄事詳見風俗及外城南城門補北闡考試官出東長安門乘輿詣順天府宴宴罷入闡北撒棘仍騎馬歸闡中略倣會試體用中書官寫白紙題卷入大竹筒加小銅鎖外用黃絹裝裏具香案拜

府丞鼓樂接出進呈

官夢錄

原在城市門今移改

增順天文鄉試八月初六日府丞同主考及執事各官

聽宣

旨後赴順天府筵宴入場揭曉次日主考及執事各官

同中式舉人入

朝謝

恩赴府筵燕武鄉試照文場例行

大典會典

增凡遇

殿試傳臚日府尹府丞於

長安門外為三及第簪花披紅赴府燕畢送狀元歸第

同上

原舊制三品衙門用銅印惟順天府用銀印誠重之也

春明夢

餘錄

原明宣宗京府箴 奕奕京師四方所瞻京尹之職民庶是誠周之內史漢之三輔不輕畀人擇賢以付國家因之有尹有丞亦有庶僚用贊厥成茫茫區域輦轂其本王者施仁篤近舉達兩體於懷務勤與周情必上通澤必下流冰清玉剛準平繩直毋愾豪右毋縱奸慝趙張邊廷顯顯前規毋愧古人祇我訓辭 官箴

原王直重修順天府記 至元中大都路廨署無定制
至或假民家以庀事其後乃市諸民得地二十畝為屋
以居我朝有天下改大都路為北平府永樂元年北京
建又改北平府為順天府因故署為治正統十四年府
尹寧陽王侯賢諭於衆改作焉為正堂後堂各五間中
堂三間左為經歷司右為照磨所前為大門凡三重各
三間六曹案牘之舍庫廩庖湆皆完崇卑廣狹各中程
度總為屋五十八間以正統十四年三月十三日興工
景泰三年七月落
成 王文端集

原雷禮順天府題名記 京師古設內史漢改置京兆
尹其地居數下憑城社者類橫恣抗法加之五方湊集
因緣為奸化難格故唐宋以來選尹皆人望或以親王
為之小事專決大事則稟奏受成忝刑部御史臺無輒
駁異蓋肅清京師鎮撫畿甸必隆重其任有若此文
皇龍飛北京改北平布政司為順天府於永樂六年先

買尹丞等官為都華重職延今百有五十三年典守定
於聖謨者赫然具在而年久法弛事變叢生一切散派
和買之類出於經限部臺往往以勢下誦而一二養望
自全者凜不敢詰積為民害問有挺節廷評以肅清鎮
撫為己任則云生事沽名九原可作安得起國初名京
兆與之論賊守也哉確山受竄劉公總尹務鈞陽穎谷
馬公以丞副之慨然有動於中思法前修表京師因閱
碑刻多訛逸後蒐輯增次具其姓名籍貫及歷官大畧
鐫之於石請記於余余惟古之圖客貌表室廬官氏使
善者知思而棄之惡者知指而懲之凡以示懲勸策事
功也況自昔京兆行事得失載之史籍萬世可鏡又不
徒為一時四方取則而已唐人諺云前尹赫赫其瞻允
若後尹熙熙其瞻允若言數政寬嚴不同其以治稱一
也又云前尹舉其綱而太簡次尹綜其目而太密後尹
設常法而取一時之聲言寬嚴失宜均之為世所譏今
二公坦易相符政不務苛細而繩檢裁然人方以赫赫

欽定四庫全書

卷六十五

熙熙並舉迺又即其前刻于石者時觀省焉愧予前尹順天不足為後人景法而附記於此亦竊與載名之榮

云古

和藹

原葉向高順天府題名記 今甲三歲一計吏治自岳牧以至尉吏鱗集於闕廷而京兆實攝郡事網紀之意蓋云惟茲郡吏具式化于王畿故郡吏之視京兆不啻望表起鵠夫內備列卿而外倡九牧秩尊而於民親則無如京兆者二百年來名公鉅卿多由茲奮確山劉公嘗刻其名於石而司空豐城雷公為之記歲久石泐今尹廣陵錢公少尹闕西劉公磐石續記而以記屬余夫司空嘗官京兆宜能言京兆余越俎而譚非其任矣然余有職于掌故不能辭則嘗取司空言讀之若慨然有慕于國初諸臣之丰裁而惻切於年來因循叢蠹之非是其為京兆規不啻詳矣余惟國家之初造耳目惟新聲靈震乎遐陬而功令肅於庶府京邑翼翼四方之極

車職順流亦可以為理故其治易也其後襲恬承熙革
穀之下日膏沐涵藏於太平之休澤寢以寢情而五方
殊技輻輳灌輸奔命於上國都市之政雜而多端奸日
萌生治利難焉又其後則恬熙益深耗蠹愈甚九閭之
聽既高而臺榭之勢易壅郊圻之內若隔萬里勢家寺
人作姦犯科官府之令不行京兆之難治遂為天下最
矣蓋嘗總郡國之政論之其在開創則外難而內易何
者依日月者愈近而易為光也其在承平則外易而內
難何者憑城社者愈近而易為蠹也方司空時去國初
纔百五十年度事揆勢已異昔日馴至於今又數十年
矣職京兆者其感慨歎息當抑又甚焉弊久則窮窮則
復思其始今日之京兆亦起弊反始之一時已今天子
神聖加意三輔赫然有願治之思而錢公劉公皆當世
名臣協力同心以理京兆將見蠹旬太和百度咸修寧
復有如司空之所慨也余故樂為之記以請于二公若
夫建置之由事權之重寬嚴忠佞不同足以鑒往詔來

語具司空記中在事者
業稔聞之矣 蒼霞草

補申時行順天府重修候氣室記 國家建日官以授
時作事占步推測之法甚密而順天治輦下其制特詳
每歲德在木迎春於東郊先五日欽天監奏遣其屬二
人往候氣其布瑄實灰重室畧如舊法隨方占之以氣
發斂知歲稔惡所司奉行以為常然且掌故莫得而詳
也府故有候氣密室在東北陬歲久頽圯乃就空殿中
行事一切取文具無有言修葺者京兆新城王公會稽
朱公移書大司空請更作奏上報可乃以公廩之羨買
材飭工即故址為室若干楹二公能崇天道敬
民事興殷補闕亦足以知其政矣 賜閒堂集

原順天府儒學在府治東南教忠坊洪武初以元太和
觀地為大興縣學國子監為府學永樂中以府學為國

子監因以大興學為府學宣德三年府尹保定李庸修
之大學士建安楊榮為作記正統十一年府學寧陽王
賢重修戶部侍郎廬陵陳循作記成化元年府尹句容
張諫興平閻鐸先後又修葺焉大學士淳安商輅作記

順天府

舊志

原順天府學在府東南洪武初建為大興縣學永樂初
以為府學正統十一年重修

明一
統志

原順天府學故報恩寺也元末有僧遊湘潭募造報恩

寺尚未安像明師下燕戒士卒毋得入孔聖廟僧倉皇
借宣聖木主置殿中後不敢去遂以為學其地元之柴
市也文文山授命焉東有祠西有館曰教忠再西有坊

曰育賢

春明夢
餘錄

原永樂元年五月禮部言舊制應天府設學不設上元
江寧二縣學今既設北京國子監以順天府學為之革
大興宛平二縣學而以大興縣學為順天府學其順天
府及二縣生徒通經能文者令充北京國子監生其餘

皆充順天府學生從之

明成祖
實錄

以上十條原在
城市門今移改

臣等謹案順天府儒學署在府學衙門育賢坊內

本朝因之西為學宮東為文山祠祀宋臣文天祥詳見
城市門又東為文昌祠學署之旁列名宦鄉賢忠
孝各祠儀門內大堂三楹顏曰明倫堂之震巽間
為奎星閣其後為敬一亭有明時石刻四箴註已
漫漶不全亭後為崇聖祠又後為尊經閣教授署
在閣之西訓導署在祠之西

補無錫茹文中居京師之高坡衙百有十歲英皇復辟之年召見便殿予冠服帶履宴順天府又命公卿造其居賀之原在城市

真珠船

門今移改

增凡鄉飲酒禮歲以正月望十月朔舉行預擇賓介具疏以

聞至期集僚屬師儒延賓介於府學禮部堂官監禮樂部和聲署設樂府學諸生侍執事歌詩飲酒揖讓獻酬

均如儀

會典大清

補陳循重修順天府學記學在今府治東南教忠坊初元太和觀也洪武元年以觀為大興縣學永樂元年

陞北平府為順天府則大興縣儒學例不得設矣遂以
為府學九年同知甄儀建明倫堂東西齋舍十二年府
尹張貫建大成殿又建學舍於明倫堂後歲久頽毀寧
陽王賢來為府尹顧其舊址多為軍民所侵乃謀於府
丞番陽王弼治中長沙易埏通判寧海楊輔推官安陸
彭理相與請復其地既得請遂撤故新之為大成殿翼
以兩廡前為戟門以祠先師先賢因舊為廟以祠宗丞
相信國文公為六齋於明倫堂東西附以棲生之舍會
饌有堂有廡有庫而藏之重門焉明年春

梁穀輩相與鑿石請於文為記

步洲集

補商輅重修順天府學記 順天府學永樂初改建至
是七十年雖數加葺治率因陋就簡未有能侈前規者
成化改元府尹張君諫相舊齋廡逼近堂廟闢東西地
廣之堂之北創後堂五間左右房各九間廟之外戟門
櫺星門皆撤而新之學之門樹有賢坊二東西對峙示
壯觀也張君去繼為尹者閻君鐸凡前工未畢者既皆足

之復念士乏棲止勞于出入擇前後隙地建號房五十餘間學後拓為射圃崇墉廣廈煥然一新尹之功大矣

商文

殷集

原京衛武學始於正統六年除教授一員訓導六員教

習勲衛子弟以兵部司官提調之

春明夢
餘錄

原京衛武學其堂名明倫六齋名居仁由義崇禮弘智

惇信勸忠

明英宗
實錄

原吳寬武學設廟像記畧京師有武學所以教諸衛武臣之子孫將世其官者其始見於正統癸亥制尚弗稱後朝廷以城東舊地賜故太平侯張公辭焉有詔改為學而以國子監丞閻禹錫掌學事成化己丑禹錫奏

請建廟特改明倫堂為大成殿而以後堂為堂英國張
公入謁數曰學必有廟廟必有聖賢像繫此獨用木主
於廟制亦弗備聞故陸侍郎家有孔子并四配像盍往
請之於是侍郎之子華喜而言曰先人為此豈欲私於
其家者哉遂以乙巳二月之吉輿置殿以上五條原在
中奉安之祭告如禮 鮑翁家藏集 以上五條原在
城市門今移改

臣等謹案京衛武學雍正十年始改為順天府武

學今裁

增金臺書院在京師崇文門內

大清一統志

臣等謹案金臺書院本義學康熙四十一年

聖祖御書廣育羣才額以賜乾隆十五年改為書院順

天府府丞臣梅穀成有記

原大興縣金名也本秦薊縣地縣治在北城教忠坊

名勝志

原大興秦薊縣漢為廣陽國東漢為郡兼立幽州仍為薊縣晉屬燕國元魏亦為幽州立燕郡隋為涿郡唐為幽州治所開元二十三年陞為望縣建中二年析西界置幽都縣五代亦為薊縣石晉割地予遼遼為幽都府開泰元年更縣為析津金得之割以遺宋宣和七年復歸金天德五年改為大興縣元興宛平同為赤縣洪武

中屬北平府倚郭縣

清類天文分野之書

補大興縣題名記光祿少卿新安尹校書隆慶四年立

旅函
話山

以上三條原在
城市門今移改

臣

等謹案大興縣署在安定門迤南教忠坊南向

自大門儀門大堂二堂至署內共六層監獄土地

祠在大門內有縣丞典史署巡檢司三一在采育

一在禮賢村一在黃村各有署

原宛平縣署在積慶坊

明順天
府志

原宛平縣唐曰幽都析薊縣置者遼始改今名縣治在

北安門西

名勝志

原宛平漢為薊縣晉屬燕國慕容雋都於此隋置遼西
郡治營州唐武德二年改為燕州天寶元年改歸德郡
建中二年為廣寧縣後朱滔罷燕州立燕都縣五代石
晉割地賂遼改幽都府領幽都縣統和二十二年改
為宛平金得之割以遺宋尋復為金所有仍為宛平元
為赤縣屬大都路洪武中屬北平府倚郭縣

清類天文
分野之書

補宛平縣題名記翰林院檢討郭鑾撰嘉靖二十八年

立

旅山 以上四條原在
話 城市門今移段

臣

臣等謹案宛平縣署在地安門外迤西積慶坊南
向自大門儀門大堂二堂至署內共六層監獄在
大門內西縣署丞署在大門內典史署在儀門東
巡檢司四一蘆溝橋一齊宗村一王平村一石港
各有署

原古墨齋在宛平縣署內唐李北海所書雲麾將軍碑

邑令李蔭購得甃之署壁旁構小亭植柳蔣花以為公

餘退思之地

燕都遊覽志

原在城門今移改

臣等謹案雲麾將軍碑至

本朝康熙年間府丞吳涵移置文文山祠並有記詳見

城市門

補朱孟震題宛平李于美明府古墨齋詩吁嗟乎雲
麾將軍毅且武一劍開元靜輦鼓身後勲名一大碑北
海筆鋒雄萬古逸勢飛騰熊虎愁寒光歷亂蛟龍舞真
跡流傳數百年何事幽州委榛莽斑斑那遣侵土花摧
頽猶解支鬢宇護持神物春復秋往往精靈泣風雨青
鞵布織過者誰披尋邵孺真良苦仙李雲仍得宛平耽

書皆古識其精萬牛犖致不遺力珠斗恍惚回光明樹之高齋顏古墨奔走好事聲喧轟由來至寶不終秘天意若待人工并青甌爾况還故物白壁誰復窺連城君不見劉柱史片石蒲城亦如此劉柱史有斷刻蜀中鐵葉銀鈎照大河微天古色今猶紫顯晦升沈各有時異人先後兩爭奇好將物態觀人理聽我長吟古墨詩

郁木生吟稿

臣等謹案以上各條叙順天府

原鴻臚寺在闕東工部之南西向宣德元年四月建

春明

夢餘錄 以上二條原在
城市門今移改

增鴻臚寺在工部南西向設卿滿漢各一少卿滿漢各

一鳴贊序班主簿附焉

大清一統志

臣等謹案鴻臚寺堂額曰肅贊朝儀前列

訓辭曰序九賓贊九儀俾大小班行靡不整肅所以尊朝廷而作萬國之觀瞻

世宗御筆也

又按鴻臚寺原設漢少卿二漢左右寺丞各一順治十五年裁漢少卿一漢寺丞一雍正四年仍隸禮部統轄嗣經

奏准寺與太常寺皆以禮部滿尚書兼管

原國初朝儀專叙品級不分散要世宗自甲午以後三十餘年不視常朝舊典無人記憶穆考登極始復常朝鴻臚搜求故實多所散失不知於世廟初年合否班行東西分立勲臣在西上東面不與百官齒左班面西侍立一品二品為第一行三品次之為第二四品五品京堂次之為第三宮坊五品六品次之為第四翰林六品七品次之為第五兩房中書次之為第六此為一段其

下則六科為第一吏部第二中書舍人第三此為一段
其下則御史第一五部次之自此以下品級官次素不
可紀矣右班面東侍立則錦衣在前五軍都督府次之
其後七十二衛指揮等官叩頭禮畢則左班內閣右班
錦衣俱由玉陛升立金臺左右六科升立甬道左右東
西向御史立於甬道左右北向其北面行禮班次則公
侯駙馬伯列三班於前去文武階次稍遠其下則文武
兩班同上御道左右分立一品二品為第一三品第二

四品五品京堂至翰林史官庶吉士第三科道中書第四其下則六部郎官亦頗紊亂其同班序立翰林七品在小九卿六品之上官坊六品在小九卿五品之上官坊五品在大九卿五品之上講讀學士在大九卿四品之上惟讓僉都少詹光學士在僉都之上至於六部郎官往時一吏二禮其下則戶兵等部故有主事立於郎官之上者其後戶部主事賀邦泰以禮部在其上嘗上疏爭之有詔六部郎中並列員外次之主事又次之久

之入稍紊矣

穀城上
房筆塵

卷六十五

補國初序朝執政大臣謂之擎天班玉堂清署謂之煥
璧班言官法司謂之劍鐔班外戚謂之椒蘭班親王謂
之瓊枝班功臣將帥謂之豹首班其餘朝臣謂之隨班

解醒

以上二條原在
宮室門分移改

臣等謹索朝儀班位

國朝定制一準爵秩崇卑為序其職在鴻臚者王公班
於丹陛上一二品官列於丹陛三品以下各就班

次東西面重行北上序立外國使臣則隨右班乾隆二年定制以吏戶禮翰詹等官為左班兵刑工都察院大理寺等官為右班十七年始以庶子侍讀侍講祭酒司經局洗馬向列三班者改列四班中允贊善修撰編修庶吉士向列四班者改列五班焉

原明宣宗鴻臚寺歲祇祀萬邦咸統于一朝觀會同其儀有秩咨爾鴻臚卿載暨屬時惟爾官必莊以肅必考于度必協于中無簡無煩周旋雍容惟動原在城以周惟一靡慝敬慎爾儀庶廣爾職官歲市門今

改移

臣

等謹案以上各條叙鴻臚寺

欽定日下舊聞考卷六十五

欽定四庫全書

欽定日下舊聞考卷六十六

官署

五

原承安四年二月詔建太學於京城之南總為屋七十
五區西序置古今文籍秘書省新所賜書東序置三代鼎

彝俎豆敦盤尊壘及春秋釋奠合用祭器

大金
國志

原大定二十八年四月命建女直太學

金史世
宗紀

原京都未有孔子廟而國學寓他署丞相興元忠憲王

諤勒哲喟然曰首善之地風化攸出不可怠乃奏營廟

學

元名臣
事畧

原至元六年七月立國子學二十四年閏二月設國子

監

元史世
祖紀

原燕京始平宣撫王楫請以金樞密院為宣聖廟二十
有四年既遷都北城立國子學於國城之東乃以南城

國子學為大都路學

元史
本傳

原時都城廟學既燬於兵楫取舊樞密院地復創立之

春秋率諸生行釋菜禮仍取舊岐陽石鼓列廡下

同上

原王巨川於灰燼之餘草創宣聖廟以己丑二月八日

丁酉率諸士大夫行釋奠禮諸儒相賀曰可謂吾道有

光矣

湛然居士集

原至元二十四年既立國學以故孔子廟為京學而提

舉學事者仍以國子祭酒繫銜

元史百官志

原國子監在城東北即元之舊學洪武改為北平郡學

永樂仍為國子學又改為國子監正堂七間曰彛倫堂

元之崇文閣也中一間列聖幸學俱設座於此上懸勅諭五通東一間祭酒公座面南司業座面西堂前為露臺臺南中為甬路前至太學門長四十三丈聖駕臨幸由之東西為墀諸生列班於此後堂三間東講堂三間西講堂三間藥房三間折而東為繩愆廳三間鼓房一間率性堂誠心堂崇志堂各十一間博士廳三間鐘房一間脩道堂正義堂廣業堂悉如率性堂六堂乃諸生肄業之所東折而南為廊房九間門一間西亦如之太

學門三間門東勅諭碑一通洪武十五年申明學制一通洪武三年定學規碑一通洪武初年欽定永樂三年申明學規碑一通洪武十六年并三十年欽定廟學圖一通廟學規制地界四至丈尺畫勒焉正統十二年十一月初四日立外東井亭一又東為持敬門以入廟自中少北為儲門以通啟聖祠土地祠及典簿典籍掌饌廳倉庫之路祭酒東廂亦由此入西井亭一又西為退省號門自西少北為廣居門以為司業入廂諸生入號

之路墀內雜植槐柏共二十株前為集賢門三間門前
為通衢東西牌坊各一題曰國子監監衢東西牌坊各
一題曰成賢街彛倫堂後齋明所九間格致誠正號每
號計三十七間嘉靖七年作敬一亭御製聖諭共碑七
座前為大門題曰敬一之門祭酒廂房在亭東司業廂
房在亭西會饌堂一所在監東北土地祠五間在饌堂
門之右典籍廳五間在饌堂門之左典簿廳三間掌饌
廳五間退省號及廣居門之西為天地人智仁勇文行

忠信規矩準繩紀綱法度凡一十八號并退省房三連

混堂淨房各一所

春明夢餘錄

原宣德四年八月脩北京國子監大成殿前兩廡

明宣宗實

錄

原宣德七年四月北京國子監請以國之東金吾等三

衛草場二所為諸生構房舍其地給本監種蔬以會饌

從之

同上

原國子監在京城東北隅景泰中御史程璈請於東長

安街之南改創基址不允

國史唯疑

以上十二條原在
城市門今移改

增國子監兼管監事大臣

特簡無定員祭酒滿漢各一司業滿漢蒙古各一掌成
均之法以教國子及俊選之士監丞掌學規以督教課
糾勤惰均廩餼博士掌闡明經說以助啟迪典簿掌簿
書以稽文移之出入均滿漢各一典籍漢一人掌經史
以備諸生誦習率性堂漢助教一學正一脩道堂漢助
教一學正一誠心堂漢助教一學正一正義堂漢助教

一學正一崇志堂漢助教一學錄一廣業堂漢助教一
學錄一掌教直省俊選之士八旗官學助教滿洲十有
六蒙古八掌分教八旗子弟算法館助教漢一人掌分
教算學生俄羅斯學助教滿漢各一掌分教俄羅斯子
弟於官學及六堂助教內委員兼司之筆帖式滿四人
蒙古漢軍各二掌文移繙繹

大清
會典

增國子監在安定門內

文廟西堂曰彛倫堂堂左右為繩愆博士二廳率性脩

道誠心正義崇志廣業六堂門曰集賢門街曰成賢街

大清
一統志

臣等謹按彛倫堂東廊為繩愆廳為鼓房有率性
誠心崇志三堂西廊為博士廳為鐘房有脩道正
義廣業三堂彛倫堂額及壁間聖經石刻皆

聖祖御書又堂額曰文行忠信前列

訓辭曰學者文行並重尤以忠信為本故孔子垂為四
教成均造士之法無踰於此

世宗御筆也彛倫堂後為敬一亭恭勒康熙四十一年
聖祖訓飭士子碑並

御書四碑一曰功存河洛一曰嵩高峻極一曰靈瀆安
瀾一曰昌明仁義外有明嘉靖間敬一歲碑及宋
儒范氏心箴程子視聽言動箴各一最後為

御書樓內尊藏

聖祖御製文集

世宗御製文集板及

御纂諸經并十三經二十二史各板本皆貯焉又有蘭亭記樂毅論明王同祖及

本朝謝履忠丁香花詩石刻彛倫堂後穿堂內祭酒司業題名碑四後堂恭懸

上諭一通又老彭觀井石刻一東有崇實振雅二軒記石刻康熙五十七年祭酒李周望謨穿堂內古文孝經石刻二東北隅為文公祠南學在國子監南方家衡衢雍正九年建為諸生肄業之所

又按國子監署有明洪武學制五朝上諭正統新建太學及廟學全圖四碑今皆摧蝕不可讀

增八旗官學在八旗分地雍正五年以就學者衆即各旗官房容百人誦讀者建為官學隸國子監

大清一統志

臣等謹按八旗官學鑲黃旗在安定門大街圓恩寺衙衙正黃旗在西四牌樓北祖家街正白旗在朝陽門內南小街新鮮衙衙鑲白旗在東單牌樓觀音寺衙衙象鼻坑正紅旗在阜成門內南巡捕

廳衙衙西口鑲紅旗在宣武門內頭髮衙衙正藍
旗在東四牌樓南新開路鑲藍旗在西單牌樓乾
石橋東斜街俱於乾隆三十四年重脩

增順治九年

世祖章皇帝臨雍幸彛倫堂講書賜賚有加四氏子孫
隨班觀禮者俱送監讀書廣監生鄉試額十五名康熙
八年

聖祖仁皇帝臨雍亦準順治九年例雍正二年

世宗憲皇帝詣學御彙倫堂講書廣監生卿試額十八名郡縣學量增入學名數琉球國自康熙二十七年遣子弟入監讀書後至是復遣就學而俄羅斯亦遣子弟入監讀書另設助教以訓課之後以四方拔貢入監者多於國子監南構房舍數百間謂之南學歲發帑銀六千兩給諸生膏火乾隆三年正月

皇上親詣辟雍釋奠於

先師孔子御纂倫堂講書賜賚有加廣監生鄉試額十

八名

特頒

諭旨訓勉多士五年

御製碑文賜南學

大清
一統志

增順治九年

皇帝勅諭國子監祭酒司業等官李爽崇古爾嘉渾等
聖人之道如日中天資之以圖治下學之以事君爾
等當嚴督諸生盡心訓誨諸生當敬奉師教身體力行

朝夕勤勵若學業成立可裨實用則教育有功其或董率不嚴荒乃職業爾師生難辭厥咎尚其勉之勿忽故諭

增雍正三年

皇帝勅諭國子監祭酒司業等官塞楞額王傳等朕唯聖人之道昭揭日月彌綸天地萬世帝王下逮公卿士庶罔不仰遵成憲率由教言我國家尊崇

至聖遠邁前代朕續承大統古訓是學維日孜孜茲雍

正二年三月朔日親詣辟雍祇謁

先師孔子行釋奠禮思以鼓勵羣英丕隆文治爾監臣
宜嚴督諸生善為導誘爾諸生亦當殫心肄業實踐躬
行秉端方以立身敦忠孝以興誼勿營奔競勿事浮華
文必貴乎明經學務期乎濟世俾品成誼進以副朕教
育至意此爾多士之庠亦唯爾監臣董率之功也慎勿
怠荒職業以貽爾羞諸師生其共勉之故諭

臣等謹按國子監署內

列聖訓諭凡通行釐序者例皆敬謹立石茲卷既以官署標名唯紀其闕於本署者恭載

垂訓成均各條餘詳國子監志

增乾隆三年

皇帝勅諭管國子監事尚書孫嘉淦祭酒國子監李鳳翥等仰唯我朝

列聖以聖人之道治天下用開太平鴻業

聖祖

世宗重道隆

師超越百代作人造士化洽寰區朕嗣守丕基勤求至道思所以廣勵學宮祇紹

前烈越乾隆三年三月二日親詣辟雍釋奠於

先師孔子升堂進講嘉與諸生闡明聖教之本原帝治之盛軌夫端教術育賢才厥唯師儒之功正身心脩德業以為國家之用諸生其可弗勉哉詩曰古之人無斁譽髦斯士放勲曰使自得之又從而振德之我

祖宗教澤涵濡薰陶長養百年於茲正學昭明揭若日月爾監臣欽承

至訓振作而鼓舞之罔有怠斂諸生率乃攸行敦本務實希賢希聖夙夜罔愆俾國家文治光裕於億萬年懋哉懋哉特諭

增

先師廟在安定門內太學左南嚮街門西為持敬門西嚮大成門崇基石闌前後三出陞門左右列戟二十有

四石鼓十石鼓音訓碣一左右各一門門內東西列
舍北嚮

大成殿崇基石闌三出陞兩廡東西嚮殿東西列舍南
嚮西廡南燎鑪一西北瘞坎一甬道左右

御碑亭

大成門外東為

神厨宰牲亭井亭各一西為

神庫致齋所更衣亭每科進士題名碑分列左右凡正

殿正門碑亭皆覆黃色琉璃後為

崇聖祠

大清會典

臣

等謹按

文廟門殿乾隆二年奉

上諭易改黃瓦三十二年

欽定大門額曰

先師廟二門額曰

大成門殿額曰

大成殿並

御書題榜又殿內恭懸康熙二十四年

聖祖御書額曰萬世師表雍正三年

世宗御書額曰生民未有乾隆三年

皇上御書額曰與天地參聯曰氣備四時與天地鬼神

日月合其德教垂萬世繼堯舜禹湯文武作之師

三十四年

御書聯曰齊家治國平天下信斯言也布在方策率性

脩道致中和得其門者譬之宮牆甬路東西分列
碑亭恭勒康熙二十五年

聖祖御製

至聖先師孔子贊二十八年

御製顏曾思孟四贊雍正六年

世宗御製仲丁詣祭

文廟詩乾隆四年

皇上御製臨雍紀事碑五年

御製仲秋釋奠詩九年

御製仲春釋奠詩十八年

御製仲秋釋奠詩二十一年

御製仲春釋奠詩二十四年

御製太學古槐詩三十三年

御製重修

文廟碑三十四年

御製仲春釋奠詩恭載卷內若迺

鴻謨

駿烈揭示成均以昭在泮告功之盛者則有康熙四十

三年

聖祖御製平定朔漠告成碑雍正三年

世宗御製平定青海告成碑乾隆十四年

皇上御製平定金川告成碑二十年

御製平定準噶爾告成碑並

御製伊犁勒銘二十四年

御製平定回部告成碑四十二年

御製平定兩金川告成碑全文具載國子監志茲卷唯
敬紀其事及歲月云

增順治十四年

諭工部文廟崇祀

先師孔子所闢典禮甚重今已年久傾圮若不速為整
理後漸頽壞葺治愈難朕發內帑銀三萬兩特加脩葺
爾部即傳諭行

增雍正元年

諭禮部

孔子道冠古今為萬世師表薄海內外無不俎豆尊崇
國學乃四方表率其制尤重

聖祖仁皇帝臨雍釋奠典禮優隆朕繼承大統景仰先
型羹牆如見念國學為造士之地聖教所被莫先於此
恐厯歲既久有應加脩葺之處爾部會同工部詳加閱
視凡

文廟殿宇廊廡及講堂學舍務須整理周備俾廟貌聿新以申景慕朕將親詣焉

增乾隆二年

諭禮部

至聖先師孔子天縱神聖師表萬世尊崇之典至我朝而極盛

皇考世宗憲皇帝尊師重道禮敬尤隆闕里

文廟

特命易蓋黃瓦鴻儀炳煥超越前模朕祇紹

先猷切思國子監為首善觀瞻之地辟雍規制尤宜崇飾大成門大成殿著用黃瓦崇聖祠著用綠瓦以昭展

敬至意

國子監志

增乾隆三十三年

諭內閣脩葺

文廟現屆落成太學規模式昭輪奐唯門題殿榜尚應詳考彙章用申景仰向來正殿稱

先師廟二門曰廟門而大門未有書額蓋沿明代舊文
未加釐正夫廟門之號於禮經所稱祖廟既涉嫌疑而
先師廟額揭諸殿楹名實尤多未稱應於大門增

先師廟額其正殿改為大成殿二門改為大成門庶符
會典定制朕親書榜字涓吉恭懸以彰崇道尊

師之至意

同上

增又奉

上諭國學崇祀

欽定四庫全書

欽定四庫全書

卷六十六

七

先師規制法程美備是飭我

列祖右文重道尊禮有加朕於臨御初卽詔易黃瓦儀
唯其隆邇以殿廡歲久弗葺特發帑金二十餘萬鳩庀
鼎新敕大臣董厥成輪奐視舊增益工就告歲而門殿
諸額尙沿明張璁陋議非所以肅觀瞻明折中也旣依
會典定名躬為榜書並宣諭釐正大指茲復親製碑記
具脩建原委且於幾暇手書付鋟表示鄭重將以明年
仲春詣學釋奠落成之彰盛典焉遐稽

闕里廟堂有後漢時犧象諸尊以為美觀爰擇內府所藏周範銅鬯尊白壘壺簋簠爵洗各一頒置太學陳之

大成殿中用備禮器夫

孔子志在從周楹間列周朝法物於義唯允所司其敬凜將事典守勿替以克副朕意欽此

同上

臣等謹按乾隆三十三年

欽頒陳設

廟庭禮器犧尊一雷紋壺一子爵一內言卣一康侯卣
一盟簋一雷紋壺一召仲簋一素洗一犧首壘一
皆周時法物

補京師設國子學教授諸生於隨朝百官集賽及蒙古
漢兒官員選擇子孫弟侄俊秀者入國子學

元典章

原至正十五年六月中書參知政事實勒門言舊立蒙古
國子監寺教四集賽并各愛滿官員子弟今宜諭之
依先例入學俾嚴為訓誨從之二十年十月朔甘露降

於國子監大成殿前柏木

元史順帝紀按實勒門滿洲語鶴子也舊作實理門愛

滿滿洲語部落也舊作愛馬今俱譯改

原中統元年許衡為國子祭酒未幾謝病歸至元八年

以集賢大學士兼國子祭酒帝親為擇蒙古弟子俾教

之衡聞命喜曰此吾事也

元史本傳

原至元八年先生授集賢大學士國子祭酒有旨教蒙

古生四人後又奉旨教七人又四方及部下願受業者

俱得與其列即南城之舊樞密院設學先生奏召舊弟

子散居四方者王梓韓思永蘇郁耶律有尚孫安高凝姚燧及其弟燾劉季偉呂端善劉安中白棟皆驛致館

下為伴讀

國學
事跡

原先生之教人也恩同父子義若君臣因其所明開其所蔽而納諸善時其動息而張弛之慎其萌蘖而防範之其日漸月漬不自知其變也日新月盛不自知其化也其言談舉止望而知其為先生弟子卒皆為世用也

考歲
畧

原延祐元年四月立回回國子監

元史仁宗紀

原延祐七年四月罷回回國子監

元史英宗紀

原皇慶元年二月朔徙大都路學所置周宣王石鼓於

國子監二年六月建崇文閣於國子監

元史仁宗紀

補崇文閣元藏書之所也今東講堂有碑存

明太學志

原國子監候日影到堂後梨樹散學

金臺集

補至大四年八月芝生國學大成殿延祐二年三月芝

生大成殿五年七月芝生大成殿

元史五行志

原先是太學因元之舊吏部主事李賢上言國家建都北京以來佛寺時復修建太學日就廢弛舉措舛錯何以示法天下請以佛寺之費修舉太學從之正統九年正月太學成上臨視祇謁先聖行釋奠禮退御彛倫堂命祭酒李時勉進講

明典彙

補太學堂有七彛倫所以會講率性修道誠心正義崇志廣業則諸生肄業所也

西隱集

補廟學建於正統癸亥至弘治十四年尚書曾鑑請修

堂宇垣牆并會饌堂十六年工竣櫺星門前舊有小巷橫溝積穢乃買劉福姚浩等地東西濶七丈五尺深入四大高築屏牆上覆以青琉璃瓦兩旁築小紅牆前為

關干以擁護之

明太學志

原兩京孔子廟易琉璃瓦自萬厯庚子始從司業傅新

德請也

國史唯疑

補內外學舍之制內號在廣居門右門一座曰退省號舍四連共四十九間其南溜室與厠自退省門漸北折

而西為天地人知仁勇文行忠信規矩準繩紀綱法度
共十八號每號計二十一間度字號北有保安堂五間
以處監生之有病者彙倫堂後有格致誠正四號計九
十八間嘉靖七年改建敬一亭外東號在廟左共三十
四間大東號在東城之北居賢坊賽百萬倉西門街門
二一曰登俊號舍東西二連共四十間一曰集英號舍
二十七間新南號在北城二條衚衕東口門一座東西
房二連共三十四間南北四間小北號在居賢坊衕衕

門一座南北房二連共八十間交趾號在監之南門一座南北房二連共二十八間西號在成賢街之西北去監五十步舊雲閑寺址也小房十間又房二層計九間本監官屬遞居之北小房四間南一間近西小房十餘

間

明太學志

補監規國子生由廣業堂肄業以漸升至率性堂然後

積分量與出身

同上

補監丞稱太學司直所居曰繩愆廳亦曰東廳博士別

有廳稱為西廳

同上

補視學規制國子監先期灑掃內殿設御座於彛倫堂中駕至則學官率諸生叩迎升座則率諸生叩拜受經則諸生環聽階下還朝宴賞則率諸生叩謝

敬事
草

原弘治改元駕臨太學有聖駕臨雍錄一卷具載敕旨奏章禮儀文儀講議官職等事

百川
書志

補隆慶元年駕幸國學朝鮮陪臣李榮賢等六員各具

本等衣冠赴彛倫堂外立文臣班次之次

明太
學志

原崇禎十四年重修太學成八月車駕臨雍祭酒南居仁坐講臯陶謨司業羅大任講易咸卦命文武官三品以上俱坐聽賜茶講畢上入敬一亭觀世宗所立程子四箴碑遂傳禮部將廟學諸碑俱摹搨進覽又石鼓文殘闕亦令察補進呈

三朝野史

補崇禎十四年八月十八日車駕臨雍釋奠禮成上步至東西兩廡偏閱諸先儒神位諭禮部國子監諸臣曰宋之周邵二程張朱六子有功聖學今擬稱先儒禮殊

未稱兩部其會同翰詹官議所以尊崇之明年二月議
定進稱先賢改題六子木主位列七十子之下漢唐
諸儒之上告於先師得旨允行

鴻一亭
筆記

補崇禎己卯上銳意復古倣周試士射宮之制命於賓
興後羣聚較射於國學之觀德堂射者皆戎服壬午亦

然

四思堂
文集

補洪武中國子生出使視行人如覈天下土田稽百司
案牘督吏民修水利出有賜還有勞永樂初頒詔諭訪

輯高皇遺文至同十三道御史問刑處囚皆舉重務以
試之然雖勞績有成無不復監卒業者其後有長差短
差之例長差若清黃窩誥之屬短差若承運庫試字司
禮監膳本禮部寫民情中書科膳黃之屬短差復監長
差則例滿附選待除不復監矣

明太學志

增洪武時國子生殷敏選入武英殿紀事授監察御史
蓋其時儲養國學有出使厯事之任又有大本堂讀書
武英殿紀事等清要之職故賢才多出其中

春明夢餘錄

原正統十一年太師英國公暨侯伯二十餘人早朝畢
奏曰臣等皆武夫不諳經典願賜一日假詣國子監聽
講上命以三月三日往祭酒李先生時勉命諸生立講
五經各一章講罷設酒饌飲甚懽先生命諸生歌鹿鳴
之詩賓主雍雍抵暮而散亦太平盛事也

寓園
雜記

原國初高麗遣金濤等四人來入太學洪武四年濤登
進士歸國其後各國及土官亦皆遣子入監監前別
造房百間居之名王子書房有奏歸省者命禮部厚賜

以榮其歸今太學前有交趾號房蓋成祖設北監以來

所以處交趾官生者

長安客話

原都城東地隅坊曰崇教街曰成賢國子監在焉國初本北平府學永樂二年改國子監左廟右學規制大備

彛倫堂之松元許衡手植也

帝京景物畧

補虞文靖謂許文正歿後國子監始立官府刻印章蓋文正為祭酒時尚在舊學所謂王宣府宅也今國學彛倫堂前樹傳是文正手植殆未必然

查浦輯聞

原北京國子監版書有喪禮一千二百八十二片類林詩集六十二片西林詩集三十片青雲賦五十片字苑撮要一百二十七片韻畧四十五片珍珠囊八十二片

王浮屠十七片孟四元賦一百十三片

天下書目

以上三十一條

原在城市門今移改

臣等謹按此所載明代書板藏之國學者今皆散

佚無存矣

原昔人好取華麗字以名類事之書如編珠合璧耶金玉英玉屑金輪寶匱寶海寶車龍筋鳳髓麟角天機錦

五色線萬花谷青囊錦帶玉連環紫香囊珊瑚木金鑒
香慈碧玉芳林之屬未能悉數聞國學樓版向有玉浮
屠不知何書當亦屬類家也又有孟四元賦孟名宗獻
字友之自號虛靜居士金時魁於鄉於府於省於御前
故號四元其律賦為學者法然金史不入文苑
之列唯見於劉京叔歸潛志月·淶水亭雜識

原唐太宗聞蘭亭真蹟在僧辨才處特遣御史蕭翼顯
得武德四年收入秦府貞觀十年始命湯普徹馮承素
諸葛貞歐陽詢褚遂良臨之而歐褚留傳最著後之所
謂定武本歐所臨也所謂唐絹本褚所臨也定武本當
時刻石禁中每紙已直萬錢迨後石晉之亂遼人輩之

而北路棄殺虎林慶厯中李學究得之其子負官緡無
償時宋景文守定武乃以帑金代償納石於庫熙寧間
薛師正出收刊一別本以應求者此郡真贋已有二刻矣
其子紹彭又摹之他石潛易古刻又剔損古刻湍流帶
左右五字為識大觀中詔向其子嗣昌取龕宣和殿後
靖康之亂金人取石鼓及蘭亭叙重氈輦至燕石鼓在
國學而蘭亭不知所在矣今存國學者疑是定州薛師
正翻刻本或薛紹彭所刻本雖非古刻然元人不能也

此石一云明初出天師菴土中一云元順帝北還重龜裏棄之於路徐中山取置國學未詳孰是

春明夢餘錄

補桑澤卿蘭亭考載何子楚跋定武本云大觀間詔取

石龕置宣和殿丙午與岐陽石鼓俱載以此今國學本

安知非與石鼓俱載而北者

吳硯錄

以上二條原在
城市門今移改

臣等謹按國學蘭亭叙石刻相傳為定武本者今

已無可考

原唐僧洛陽亞棲草書得張顓筆意草書千文在國子

監

格古要論補

原趙文敏公臨王右軍樂毅論黃庭經蘭亭定武本顏魯公爭座位帖張平叔金丹四百字五碑俱在北京國

子監

考樂以上二條原在餘事城市門今移改

臣等謹按今所存唯蘭亭叙樂毅論二臨本至黃庭經爭坐位金丹四百字諸刻已佚

欽定日下舊聞考卷六十六

欽定日下舊聞考卷六十六舉正

清要之職原書職訛責今改

明初國子生條



欽定日下舊聞考卷六十六舉正

欽定四庫全書

史部

欽定日下舊聞考卷六十八

詳校官庶吉士臣胡鈺

檢討臣德生覆勘

總校官進士臣程嘉謨

校對官中書臣葉元符

謄錄監生臣汪人瑞

欽定四庫全書

欽定日下舊聞考卷六十七

官署

張

種大成門內石鼓各五西有石鼓文音訓碑一通外持
敬門東有元加封聖號詔書碑大德十一年七月建西
有元加封先聖父母妻并四配制詞碑一通至順二年
九月建對廊樹厯科進士題名碑

明太學志

敬門東有元加封聖號詔書碑大德十一年七月建西
有元加封先聖父母妻并四配制詞碑一通至順二年

有元加封先聖父母妻并四配制詞碑一通至順二年

九月建對廊樹厯科進士題名碑

明太學志

原永樂二年三月命工部建進士題名碑于國子監命

侍讀學士王達撰記題名碑有記始此

憲章錄

原永樂十三年令立石北京國子監

登科考

原進士題名碑原在國子監大成門下正統間移於太

學門外

明典彙

原景泰二年五月左春坊左諭德管國子監司業事趙

琬奏進士題名立石大成門下俾諸生出入皆得瞻仰

誠激勸後學之意正統間移于太學門外風雨飄淋易

于損壞乞勅工部造屋覆蓋以圖經久從之

明英宗實錄

原天順七年八月久雨壞國子監碑亭仆進士題名碑
五通上命有司修碑亭并豎其碑同上

原明永樂十三年始會試天下舉人於北京登科考謂
是年即令立石國子監然今無有有之自宣德五年始

六館 以上七條原在
日抄 城市門今移改

臣等謹按元代題名三碑

本朝國子監祭酒吳苑於啟聖祠土中得之至明代七
十有六碑始永樂十八年李騏榜訖崇禎十六年

楊廷鑑榜謂始於宣德五年林震榜者誤也其缺者惟萬厯八年崇禎十年兩碑耳

原永樂十三年乙未陳循榜十六年戊戌李騏榜十九年辛丑曾鶴齡榜二十二年甲辰邢寬榜宣德二年丁未馬愉榜碑無宣德五年庚戌林震榜太子少保禮部尚書兼武英殿大學士金幼孜撰文禮部精膳司郎中陳景茂篆書宣德八年癸丑曹鼐榜禮部尚書兼翰林學士楊溥撰文禮部郎中黃養正書正統元年丙辰周放榜碑無正統四年己未施槃榜翰林院學士錢習禮撰文太常寺少卿兼翰林院侍書程南雲書正統七年壬戌劉鑑榜碑無正統十年乙丑商輅榜翰林院學士程廷官曹鼐撰文中書舍人程學書正統十三年戊辰彭時榜兵部右侍郎兼翰林院侍讀學士苗衷撰文中書舍人黃采書景泰二年辛未柯潛榜少保兼太子太

傳戶部尚書文淵閣大學士陳循撰文太常寺少卿王
謙書景泰五年甲戌孫賢榜少保兼太子太傅戶部尚
書文淵閣大學士陳循撰文吏部考功司郎中董輿書
天順元年丁丑黎淳榜吏部尚書兼翰林院學士知制
誥李賢撰文順天府丞余謙書天順四年庚辰王一夔
榜吏部尚書兼翰林院學士李賢撰文禮部儀制司員
外郎凌耀宗書天順七年癸未彭教榜少保吏部尚書
兼華蓋殿大學士李賢撰文禮部祠祭司員外郎謝宇
書成化二年丙戌羅倫榜太子少保禮部尚書兼文淵
閣大學士陳文撰文禮部郎中陳綱書成化五年己丑
張昇榜太子少保吏部尚書兼文淵閣大學士彭時撰
文太常寺少卿林章書成化八年壬辰吳寬榜碑仆成
化十一年乙未謝遷榜太子少保戶部尚書兼翰林院
學士萬安撰文太常寺少卿謝宇書成化十四年戊戌
曾彥榜太子少保戶部尚書兼文淵閣大學士劉珏撰
文禮部儀制司主事兼司經局正字凌暉書成化十七

年辛丑王華榜碑仆成化二十年甲辰李昊榜碑仆成
化二十三年丁未費宏榜少傅兼太子太傅吏部尚書
謹身殿大學士徐溥撰文太僕寺少卿姜立綱書弘治
三年庚戌錢福榜少保兼太子太保戶部尚書武英殿
大學士邱濬撰文大理寺右寺副劉榮書弘治六年癸
丑毛澄榜太子太保禮部尚書武英殿大學士劉健撰
文大理寺左傳副兼司經局正字周文通書弘治九年
丙辰朱希周榜太子太保戶部尚書兼謹身殿大學士
李東陽撰文尚寶司卿兼司經局正字劉榮書弘治十
二年己未倫文叙榜少師兼太子太師吏部尚書華蓋
殿大學士劉健撰文太常寺少卿周文通書弘治十五
年壬戌康海榜碑仆弘治十八年乙丑顧鼎臣榜碑仆
正德三年戊辰呂柟榜少師兼太子太師吏部尚書華
蓋殿大學士焦芳撰文太常寺少卿周文通書正德六
年辛未楊慎榜碑仆正德九年甲戌唐華榜少師兼太
子太師吏部尚書華蓋殿大學士楊廷和撰文太常寺

神劉榮書正德十二年丁丑舒芬榜少保兼太子太保
禮部尚書武英殿大學士賈詠撰文太常寺少卿兼經
筵侍書劉榮書正德十六年辛巳楊維聰榜少師兼太
子太師吏部尚書華蓋殿大學士楊廷和撰文太常寺
卿劉榮書嘉靖二年癸未姚涑榜少師兼太子太師吏
部尚書華蓋殿大學士費宏撰文太常寺卿劉榮書嘉
靖五年丙戌龔用卿榜碑仕嘉靖八年己丑羅洪先榜
太子太保吏部尚書兼武英殿大學士李時撰文順天
府丞周令書嘉靖十一年壬辰林大欽榜少師兼太子
太師吏部尚書華蓋殿大學士夏言撰文太僕寺卿張
文憲書嘉靖十四年乙未韓應龍榜吏部右侍郎兼東
閣大學士李本撰文通政司使張文憲書嘉靖十七年
戊戌茅瑒榜少師兼太子太師吏部尚書謹身殿大學
士嚴嵩撰文禮部左侍郎兼司經局正字張電書嘉靖
二十年辛丑沈坤榜太子太保禮部尚書兼翰林院學
士徐階撰文工部右侍郎談相書嘉靖二十三年甲辰

秦鳴雷榜禮部尚書兼翰林院學士孫承恩撰文大理寺右寺副閣書嘉靖二十六年丁未李春芳榜太

子大保禮部尚書顧可學撰文大理寺左寺正吳昂書嘉靖二十九年庚戌唐汝楫擢吏部尚書李熙撰文大

理寺右評事吳應鳳書嘉靖三十二年癸丑陳謹榜少保兼太子太傅禮部尚書徐階撰文山東布政司參議

王槐書嘉靖三十五年丙辰諸大綬榜碑文判落嘉靖三十八年己未丁士美榜太子賓客吏部左侍郎兼翰

林院學士郭樸撰文中書舍人管翰林院典籍事顧從禮書嘉靖四十一年壬戌申時行榜少保兼太子太保

戶部尚書武英殿大學士知制誥袁燁撰文大理寺右寺正叢起書嘉靖四十四年乙丑范應期榜太子太保

吏部尚書兼武英殿大學士知制誥嚴訥撰文大理寺左評事兼翰林院侍書李中書隆慶二年戊辰羅萬化

榜太子太師吏部尚書建極殿大學士李春芳撰文尚寶司少卿兼翰林院侍書吳自成書隆慶五年辛未張

元祚榜少師兼太子太師吏部尚書中極殿大學士申
時行撰文太僕寺少卿兼司經局正字徐繼中書萬歷
二年甲戌孫繼皋榜大學士王錫爵撰文光祿寺少卿
兼司經局正字成楫書萬歷五年丁丑沈懋學榜少傅
兼太子太傅禮部尚書建極殿大學士許國撰文太僕
寺少卿兼司經局正字馬極文書萬歷八年庚辰張懋
修榜大學士葉向高撰文通政司知事唐尚中書萬歷
十一年癸未朱國祚榜太子太保禮部尚書兼武英殿
大學士王錫爵撰文大理寺右寺副趙應宿書萬歷十
四年丙戌唐文獻榜記無萬歷十七年己丑焦竑榜記
無萬歷二十年壬辰翁正春榜太子太保戶部尚書兼
文淵閣大學士張位撰文通政司經歷章如璉書萬歷
二十三年乙未朱之蕃榜太子少保禮部尚書兼文淵
閣大學士陳于陞撰文通政司經歷湯應龍書萬歷二
十六年戊戌趙秉忠榜記無萬歷二十九年辛丑張以
誠榜記無萬歷三十二年甲辰楊守勤榜記無萬歷三

十五年丁未黃士俊榜記無萬歷三十八年庚戌韓敬
榜記無萬歷四十年癸丑周延儒榜少師兼太子太
師吏部尚書中樞殿大學士葉向高撰文通政司知事
周承尚書萬歷四十四年丙辰錢士升榜記無萬歷四
十七年己未莊際昌榜記無天啟二年壬戌文震孟榜
記無五年乙丑余煌榜記無崇禎元年戊辰劉若宰榜
記無崇禎四年辛未陳于泰榜記無崇禎七年甲戌劉
理順榜記無崇禎十年丁丑劉同升榜記無崇禎十三
年庚辰魏藻德榜記無崇禎十六年原在城市
癸未楊廷鑑榜碑未立六館日抄門今移改

朱彝尊原按進士題名其初釋褐後即撰記立石
後乃有遲之一二十年始立石者至萬歷丙戌已
丑則有題名而無記戊戌以後則惟癸丑一榜有

記而已士大夫論資格日嚴而忽視題名如此良可歎也

補國子監碑亭惟西南隅崇禎庚辰進士題名碑下尚可容兩碑因又立庚辰科特用題名碑僅容癸未科進士題名碑立于其次更無餘地可以立碑而明之進士

題名止此亦異矣

蒯邱
雜抄

原崇禎庚辰上有厭薄進士之意故將下第舉人與廷試貢士史惇等一百六十三人吳康侯等一百人盡留

特用於是博等上疏請援進士例謁文廟行釋菜禮并立石題名閣臣張四知以為不可上命如所請大學士周延儒奉勅撰文太僕寺少卿兼翰林院侍書朱國詔奉勅書并篆額工部營繕司郎中王灝監刻今石立於國學中

雜記 以上二條原在
城市門今移改

臣等謹按

國朝題名碑惟順治壬辰乙未繙譯科另為碑刻餘則滿漢同一碑肇自順治三年丙戌傳以漸榜四年

丁亥呂宮榜六年己丑劉子壯榜九年壬辰鄒忠
倚榜又麻勒吉榜十二年乙未史大成榜又圖爾
宸榜十五年戊戌孫承恩榜十六年己亥徐元文
榜十八年辛丑馬世俊榜康熙三年甲辰嚴我斯
榜六年丁未繆彤榜九年庚戌蔡啟傅榜十二年
癸丑韓莢榜十五年丙辰彭定求榜十八年己未
歸允肅榜二十一年壬戌蔡升元榜二十四年乙
丑陸肯堂榜二十七年戊辰沈廷文榜三十年辛

未戴有祺榜三十三年甲戌胡任輿榜三十六年
丁丑李蟠榜三十九年庚辰汪繹榜四十二年癸
未王式丹榜四十五年丙戌王雲錦榜四十八年
己丑趙熊詔榜五十一年壬辰王世琛榜五十二
年癸巳王敬銘榜五十四年乙未徐陶璋榜五十
七年戊戌汪應銓榜六十年辛丑鄧鍾岳榜雍正
元年癸卯于振榜二年甲辰陳德華榜五年丁未
彭啟豐榜八年庚戌周霽榜十一年癸丑陳侯榜

乾隆元年丙辰金德瑛榜二年丁巳于敏中榜四
年己未莊有恭榜七年壬戌金甡榜十年乙丑錢
維城榜十三年戊辰梁國治榜十六年辛未吳鴻
榜十七年壬申秦大士榜十九年甲戌莊培因榜
二十二年丁丑蔡以臺榜二十五年庚辰畢沅榜
二十六年辛巳王杰榜二十八年癸未秦大成榜
三十一年丙戌張書勲榜三十四年己丑陳初哲
榜三十六年辛卯黃軒榜三十七年壬辰金榜榜

四十年乙未吳錫齡榜四十三年戊戌戴衢亨榜
四十五年庚子汪如洋榜四十六年辛丑錢棨榜
皆列甲第姓名里貫每科各立一碑云

增

聖祖御製祭酒箴 予敷文德式禮辟雍允惟祭酒多
士攸宗在昔有虞命夔教胄洎于成周升彼孝秀撫今
區夏遵路陳常海域遣子願齒膠庠爾長乃司表率匪
易木繩斯直玉琢斯器烝烝譽髦爾儀是型濟濟橋門

爾訓是聆惟廉持躬惟慎率屬能達其懲戒董其最皇
矣謨典如鏗金鑄闡揚罔盡則倣奚從毋矜而華導之
誠正毋詭而趨範之孔孟王化丕盛視乎成均苟隳厥
職曷明人倫儒行克臧汝績乃效黽勉詔繳助宣聲教
增

皇上御製賜南學碑文 士為四民之首而太學者教
化所先四方于是觀型焉比者聚生徒而教育之董以
師儒舉古人之成法規條亦既詳備矣獨是科名聲利

之習深入人心積重難返士之所為汲汲皇皇者惟是
之求而未嘗有志于聖賢之道不知國家以經義取士
使多士由聖賢之言體聖賢之心正欲使之為聖賢之
徒而豈沾沾焉文藝之末哉朱子同安縣諭學者云學
以為己今之世父所以詔其子兄所以勉其弟師所以
教其弟子弟子之所以學舍科舉之業則無為也使古
人之學止於如此則凡可以得志於科舉斯已爾所以
孜孜焉愛日不倦以至於死而後已者果何為而然哉

今之士惟不知此以為苟足以應有司之求矣則無事于汲汲為也是以至於惰遊而不知反終身不能有志于學而君子以為非士之罪也使教素明于上而學素講於下則士者固將有以用其力而豈有不勉之患哉諸君苟能致思于科舉之外而知古人之所以為學則將有欲罷不能者矣觀朱子此言洵古今通患夫為己二字乃入聖之門知為己則所讀之書一一有益于身心而日用事物之間存養省察闡然自修世俗之紛華

靡麗無足動念何患詞章聲譽之能奪志哉況即為科舉亦無礙于聖賢之學朱子云非是科舉累人人累科舉若高見遠識之士讀聖賢之書據吾所見為文以應之得失置之度外雖日日應舉亦不累也居今之世雖孔子復生也不免應舉然豈能累孔子耶朱子此言即是科舉中為己之學誠能為己則四書五經皆聖賢之精蘊體而行之為聖賢而有餘不能為己則雖舉經義治事而督課之亦糟粕陳言無裨實用浮偽與時文等

耳故學者莫先於辨志志於為己者聖賢之徒也志于
科名者世俗之陋也國家養育人材將用以致君澤民
治國平天下而囿于積習不能奮然于聖賢豈不謬哉
朕膺君師之任有厚望于諸生適讀朱子書見其言切
中士習流弊故親切為諸生言之俾司教者知所以教
而學者知所以學

增

聖祖御製

至聖先師孔子贊

并序

蓋自三才建而天地不居其

功一中傳而聖人代宣其蘊有行道之聖得位以綏猷
有明道之聖立言以垂憲此正學所以常明人心所以
不泯也粵稽往緒仰溯前徽堯舜禹湯文武達而在上
兼君師之寄行道之聖人也

孔子不得位窮而在下兼剛述之權明道之聖人也行
道者勲業炳于一朝明道者教思周于百世堯舜文武
之後不有

孔子則學術紛淆仁義湮塞斯道之失傳也久矣後之人而欲探二帝三王之心法以為治國平天下之準其奚所取衷焉然則

孔子之為萬古一人也審矣朕巡省東國謁祀闕里景仰滋深敬摛筆而為之贊曰 清濁有氣剛柔有質聖人參之人極以立行著習察舍道莫由惟皇建極惟后綏猷作君作師垂統萬古曰惟堯舜禹湯文武五百餘歲至聖挺生聲金振玉集厥大成序書刪詩定禮正樂

既窮象繫亦嚴筆削上紹往緒下示來型道不終晦秩
然大經百家紛紜殊途異趣日月無踰美牆可晤

孔子之道惟中與庸此心此理千聖所同

孔子之德仁義中正秉彛之好根本天性庶幾夙夜最
哉今圖溯源洙泗景躅唐虞載歷庭除式觀禮器濡毫
仰贊心焉遐企百世而上以

聖為歸百世而下以

聖為師非師

夫子惟師于道統天御世惟道為寶泰山巖巖東海泱泱牆高萬仞

夫子之堂孰窺其藩孰窺其徑道不遠人克念作聖

增

聖祖御製四子贊

復聖顏子

聖道早聞天資獨粹約禮博文不遷不貳一善服膺萬

德來萃能化而齊其樂一致禮樂四代治法兼備用行
舍藏王佐之器

宗聖曾子 洙泗之傳魯以得之一貫曰唯

聖學在茲明德新民止善為期格致誠正均平以推至
德要道百行所基纂承統緒修明訓辭

述聖子思子 於穆天命道之大原靜養動察庸德庸
言以育萬物以贊乾坤九經三重大法是存篤恭慎獨
成德之門卷之藏密擴之無垠

亞聖孟子 括人既姜楊墨昌熾子輿闢之曰仁與義
性善獨聞知言養氣道稱堯舜學屏功利煌煌七篇並
垂六藝

孔學攸傳禹功作配

臣等謹按孔門四賢並有

皇上御製贊但黌宮內未經奉

諭立石今準國子監志之例惟載自

臨雍紀事碑始

增

皇上御製臨雍紀事碑 天生烝民若有恒性人道立
焉亶生聰明神聖作之君作之師以厚其生以正其德
綱常之所以不墜倫類之所以相維相保于天地間者
斯焉是賴古聖王繼天立極君師之道兼隆負乎尚矣
繼是以來雖代有君而克盡其為君之道者蓋寡若夫
同天地亘今古繼往聖開來世特立為師之道于宇宙
間者則惟我

先師孔子一人敬惟

孔子集羣聖之大成祖述憲章垂教萬世使後之帝王
建極綏猷得有所遵循以求治法道法之大全由之則
治悖之則亂大哉

孔子功參乎覆載明並乎日月生民以來未有盛焉者
也我

列祖撫御寰區叙彝倫明禮樂誠民阜俗一惟

孔子所傳之大經大法是矩是式微言與義悉推闡而

表章之統緒相承心源符契欽敬追崇之盛典超越往
代具在曩章予小子懋學書闡景行志切逮寅承

丕緒祇奉

先猷夙夜兢兢繹思

聖道越乾隆三年季春上日躬釋奠于

先師前期飭官庀材崇飾廟貌特命大成殿大成門覆
以黃瓦崇聖祠覆以綠瓦稱朕慕道崇師至意記曰禮
時為大宜次之稱次之先王之制禮也順于鬼神合于

人心惟其稱而已太學者帝王尊師之地盡禮備物以
明尊也稱其德而不為過宜莫大焉抑非以炫耳目之
觀也欽崇至道敷政教以淑羣黎法

祖隆

師罔敢或斁俾薄海內外無一夫不與被

聖人之澤斯朕志也夫乾隆四年己未用允廷臣之請
勒文紀事以垂示于奕世系以詩曰 於昭道統淵源
三五

至聖挺生立極萬古贊修刪定為帝王師天地悠久斯
文在茲惟我

祖

宗博崇典禮爰謁林廟爰封祖禰予膺鴻緒彛憲是承
釋奠視學大昕鼓徵萬仞宮牆圜橋首善笙鏞斯陳俎
豆斯薦耽耽翼翼鳥革翬飛制符宸居金碧流輝丕煥
宏模神明所宅玉振金聲永揚教澤式眎兆庶式育才
賢光宣文治億萬斯年

增

御製重修文廟碑記

舉江淮河濟以贊海吾知其不知海舉嵩岱恒華以贊地吾知其不知地然則舉道德仁義以贊

孔子者其亦類於是乎夫江淮河濟豈不為海所納而不足以形海之大然海固不拒江淮河濟以為水也嵩岱恒華豈不為地所載而不足以究地之厚然地固不讓嵩岱恒華以為土也道德仁義豈不為

孔子所垂而不足以盡

孔子之量然

孔子固不外道德仁義以為教也教之義始見於虞書而未有定所夏校殷序周庠學則三代共之是國學所昉乎夫三代既有學亦必有教而吾以為

孔子立道德仁義之教者何蓋三代以前之教非

孔子不明三代以後之教非

孔子不立亦猶江淮河濟非海不納嵩岱恒華非地不

載道德仁義非

孔子不垂也國學始于元太祖置

宣聖廟於燕京由元及明代有損益修葺至本朝而崇奉規模為大備

列聖右文臨雍必事輪奐乾隆戊午朕詣學展儀先詔易蓋黃瓦聿昭茂典然丹雘雖致飾壯觀而上棟下宇風雨燥濕歷年既久浸欹是虞爰以歲丁亥發帑二十餘萬特簡重臣司其事越己丑仲春告歲工朕親釋奠

以落成焉先是言臣有以宜乘此時修復

辟雍園水之制為請者禮官以為三代之制弗相沿襲
實政不必泥古朕以其言良是遂從之門殿諸額一準
會典皆親書各懸于其所舉大工者必泐碑以誌故叙
其事書之若夫述

孔子之言仍以頌

孔子是猶繪日月星辰以象

天朕有所不能

增

世宗御製詣太學詩 禮樂牖民資大化國家造士在
斯文臨雍觀禮崇儒切視學論經養俊殷濟濟橋門龍
旆繞雍雍壁水鳳毛紛千官咸慶文明盛還佇同風率
土忻

增

世宗御製仲丁詣祭

文廟詩 扶植綱常百代陳天將

夫子覺斯民帝王師法成隆治兆庶遵由臻至溥道統
長垂今與古文明共仰聖而神功能溯自生民後地闢
天開第一人

增

世宗御製詣太學詩 辟雍親蒞止典禮重參稽管籥
仍魚雅威儀自整齊禮門資至化義路牖羣黎永翊文
明治休徵共受禋善俗禮為本仁民域可躋崇儒申術
教造士列東西共式習如性咸成璋與珪興賢勤寤寐

振德日提撕

增乾隆五年

皇上御製庚申仲秋丁祭詩 法

祖版文德崇儒禮

素王晨光開輦輅露氣浥旂常寅祀心恒凜丁辰日正
陽皇皇陳禮樂肅肅對宮牆言念百王後身登

夫子堂君師誠有愧仰止志方長

增乾隆九年

御製二月上丁釋奠

先師孔子詩 靈春惟仲月吉日值丁辰禮樂遵先進

詩書淑兆民

宮牆增慕永俎豆薦馨新敢謂百王後能傳一脉真承
筐將素幣獻爵列儒臣試問得門者誰為不愧人

增乾隆十八年

御製仲秋釋奠

先師孔子詩 高居詎恃九重尊丁祭親承率駿奔山

海從來欽出類

宮牆何有得其門樂音六奏非鐘鼓禮器千年復簋罇
經席昨臨今釋奠躬行未逮敢他論

增乾隆二十一年

御製仲春釋奠

先師孔子詩 經筵昨甫過釋奠此親臨寧僅崇文典
惟殷望道心衣冠集魚雅殿幕仰深沉道法參天地神
依貫古今千年綿後裔六佾協元音

聖藻光楣招

君師責並欽

增乾隆三十四年

御製仲春上丁釋奠

孔子并落成國學卽事詩 國學維新建落成躬承丁

祭致寅精經綸萬古歸

陶冶

道德千秋示典程祇覺行難增以愧未能言贊出乎誠

兩朝題額奎章煥心法由來治法并

予曰三年必有成虞傳惟一與惟精益滋宵旰寸心慙
敢謂治安百世程周鼎載陳古如式春芹敬薦潔為誠
試看陪禮來東魯教澤幬幪奕葉并

增乾隆二十四年

御製國學古槐詩 國學古槐一株元臣許衡所植閱
歲既久枯而復榮當辛未一枝再茁之初適

慈寧六旬萬壽之歲槐市諸生傳為瑞事大學士蔣溥

繪圖以紀曾題六韵卷中監臣觀保等請勒石講堂垂示久遠書以賜之 賢宮嘉蔭樹遺跡緬前賢初植至元歲重榮辛未年奇同

曲阜檜靈紀易林乾徵瑞作人化符祥

介壽延喬柯應芹藻翠葉潤觚編右相非誇繪由來事可傳

臣等謹按國學古槐

御製詩是為首見之篇今恭錄卷內

原元太宗即位之五年新建國子學於燕京御製宣諭
二通其一通諭多羅岱等及十投管蒙等官方是時
遣蒙古子弟一十八人來習漢人語言文字復檢漢人
子弟二十二入習蒙古言語弓箭命提領陳時可擇二
名儒管勾并主守孔子廟道人馮志亨選秀士二人通
儒道人二人分作四牌子教讀不率教者以簡子量筆
之更權用燕京真定厯日銀建立夫子廟兩廡及肄業
之舍其子弟日給米一升麵如之內一斤晚同給酒一
升家糧之給亦一升土著者皆不與又於降戶每人撥
小蒼頭一名以奉使令此蛇堯年六月初九日所頒也
其一通諭受學子弟員習漢人文書之外並諸匠藝事
及藥材所用彩色所出地理州郡所紀下至酒醴麴蘖
水銀之造飲食烹飪之制皆欲周覽旁通仍戒飲酒不
可有違恒度而于習講尤諄諄也所頒之年月與前同
不書何日意稍後于前亦不過旬日爾後十六年當定
宗崩之明年己酉十月望日夫子廟住持賜紫和觀李

志元始龔樂石令重元子葛志先刊置學中其左方序
列四教讀弟子名蒙古筆且齊自札爾古齊以下凡十
九人漢人筆且齊自文宣勢而下凡二十八人所謂筆
且齊者譯言書生也其數比舊有所加者續有慕效而
來者耳又列羅劉二通事不著其名又列宣授蒙古筆
且齊四牌子總教馮志亨宣授金牌提舉國子學事中
書楊惟中御前宣議國子學事賽音袞巴克實李志常
三人銜名所謂巴克實譯言師傅也惟中即楊文肅公
從事征行勞烈甚著餘若志元志先志常則皆黃冠師
當時制尚淳實混儒道二者為一不復異別有合于老
易同用之者厥後元勲碩輔頗有為道家所薦而起者
漁謹按蛇兒年六月九日正金哀宗天興二年癸巳六
月壬午也金自宣宗以貞祐二年五月壬午遷汴三年
五月庚申燕京入我職方至是垂二十載立學以教胄
子固惟其時然竊獨怪是年王師南征園泮蹴蔡汝策
制勝日不暇給而太宗乃以教育英才為先務而其為

教又能達事理不差鑿鑿見諸實用神謀睿算度越前
王天縱之聖為不可及已列聖有作益修成均養士之
制百年以來遂用人文化成天下茲益其權輿者歟石
刻今藏京師與御賜宣聖王箚皆提舉學事者司之每
當代去出以相傳且繫其名于籍非惟不忘其本先蓋
亦慎之至也漁因得而備述俾覽者知祖宗垂意學校
文運之興殆非一日而纂修史臣或得以參考焉
漢集 按多羅岱蒙古語七數也舊作奪羅斛筆且齊
蒙古語寫字人也舊作必閣赤扎爾古齊蒙古語斷事
人也舊作扎古魯真今俱譯改文宣努舊作文宣奴今
對音譯改賽音蒙古語好也哀深也已
克實師也舊作仙孔八合識今譯改
原在城市
門今移改

臣等謹按此條所引有元太宗諭二通故列為前

代帝製之首

原明宣宗國子監箴 翼翼京師巖巖學宮首善之地是
維辟雍四方髦士來遊來學業之所專詩書禮樂學必

有師為士永式祭酒司業暨乃眾職師道克敷士乃有
成俊乂奮興為國之禎咨爾為師敬爾儀則以教以率
罔懈朝夕咨爾為學明善誠身克智與能匪敬弗臻俗
化所自賢才所出其於國家甚重而切勗爾師生咸篤

於誠無忽於行式觀厥成

官箴

原明英宗重建太學碑畧 北京故有學在宮城之良

隅庠序稱正統八年秋命有司撤而新之明年春成
朕躬釋奠於先師循古典也退即學之彛倫堂命儒臣
講經公卿大夫百執事之臣縫掖之士兵衛之師拱侍
而聽殆以萬計已而有司請如故事紀其成于碑敬書

貞石昭示後人 明英宗實錄

原馬祖常大興府學孔子廟碑 昔我太祖皇帝受命

興邦金人遜于汴太祖即以全燕開大藩府制臨中夏
維時已有定都之志矣故太宗皇帝首詔國子通華言

通倂貴臣子弟十八人先入就學時城新創于兵學官攝于老氏之徒世祖皇帝教命下始正儒師復官學廟事孔子歸孺垣四侵地勒石具文作新士子至元二十四年既成今都立國子學位於國左又因故廟為今學京師雖五方俗尹治日不給廟之牆屋弊壞將廕以毀講習之堂粗完泰定三年令大尹曹候上視廟貌祠位皆不如制割稍入為寮寮倡然後大家富室合貲以聚財者有焉釋子方士分食以它徙者有焉施施于咸樂于成延兩廡五十有二楹締構塗飾工良物辦象從祀諸賢百有五人妥靈惟肖威儀有容人懇請于朝得庶餼弟子員百人受學于師復其身不勞以事于是天下首善之教興焉廟肇自唐咸通中遇遼金燕為都邑故嘗用天子學制選舉升造與南國角立亦一時之盛也而太宗皇帝當雲雷經綸之世聖訓諄切以德賞勗父師以櫛楚懲子弟饑焉粟肉渴焉酒醴力焉僕使思義甚備具養賢勸善之誠固已高出百王之上矣世祖

皇帝立極作則人文宣明登用儒臣躬親講學故當時
敷賢之裔以及宿衛之臣罔不以揖讓俎豆之為懿顯
蒙昏愚之為恥也而三代國學黨序遂庠家塾之等秩
然羅列于上下才學經術用世之士踵武而出暨仁宗
皇帝賓興大比四方舉進士凡登賢書策名禮部者京
師屢倍于外郡非列聖仁涵義揀百年之禮樂文物推
而致之歟燕自虞夏為武衛之服召公之化尚矣昭王
築臺以徠賢士鄒衍樂毅劇辛至有稱于世韓嬰以詩
易為一家師孔穎達博綜五經卓然庶幾醇儒今多士
游歌在庭挺衣在廟時見鄒魯之美矣若嬰穎達宜所
不道矧衍毅辛之徒哉夫儒者之學詩書六藝之文以
至施之天下之道無有二也後世教不興家異人殊各
溺于所習以相詆訾由上之教無以一之也嗟夫古者
小學大學之師弟子之傳皆本于道德仁義之實著于
詩書六藝之文非有教有授則不敢以傳也傳焉而龐
雜不經則上有刑也是故風淳而氣同由上文教有以

一之也而王國多士逢文明之會肄業有學學有師春
秋禮其先聖先師者又有廟有位入有食以處出有貴于
衆所以報稱列聖教化之德而應賢侯承宣之志者必
彈冠而起矣提舉學事崔居中教授賈良弼正張楨錄
司視以狀請曰廟之成前尹瑪蘓庫實能始之今尹曹
偉實能終之經歷王孝祖薛議警巡按院烏德美使李
權且能考工于下也余既為言正充邸汧鄒四公配食
東嚮位其來請遂為銘詩不辭詩曰 皇元有赫奄受
大國于月之蟬于日之域京邑翼翼莫不來極予誕敷
文德新都有嵯辟雍我我璵弁之璫濟爾象犧鉤爾絃
歌新宮則那蕩廟如之何皇帝在御百度咸若海輪惟
缺河得厥柏是尋是斯廡庠嶽嶽式光我上國至聖儀
儀元祚龍衣衍我先師既右享之采芻于池薦比明犧
用介我蕃釐蕃釐伊何彼美多士克明克類克諒厥事
以登臚仕以媚于天子有鏗華鍾路鼓逢逢言燕于公
有異有顯多士既同天府是庸惟曹侯之功曹侯閭閭

通志 卷六十七
通志 宣御制乃專慶延連連王士安安祇國維賢天子萬年 名田集 按馬滿洲語粗也 獲庫皮也 舊作馬斯急烏德美蒙古語送也 舊作兀都 麟今俱譯改烏原程鉅夫國學先聖廟碑 皇慶二年春皇帝若曰我元嗣百世之統建萬民之極誕受厥命作之君師世祖混一區宇亟修文教成宗建廟學武宗追尊孔子所以崇化育材也朕纂丕圖監前人成憲期底于治可樹碑于廟詞臣文之臣某拜手稽首奉詔言曰臣聞遠古之初惟民生厚風氣漸靡聖人憂之越有庠序學校之制天下之治胥比焉出中統二年以儒臣許衡為國子祭酒選朝臣子弟兄弟子員至元四年作都城畫地宮城之東為廟學基二十四年備置監學宮元貞元年詔立先聖廟又未集大德三年春丞相臣哈喇哈斯達爾罕大懼無以祇德意乃身任之飭五材鳩衆工責成工部郎中臣賈馴馴心計指授晨夕垂懈工師用勸十年秋廟成謀樹國子學御史臺臣復以為請制可至大元年

冬學成廟度地頃之半殿四阿崇尺六十有五廣倍之
深視崇之尺加十焉配享有位從祀有列重門修廊齋
廬庀庫為楹四百七十有八學在廟西北孫于廟者十
之二中國子監東西六館自堂徂門環列鱗比通教養
之區為間百六十有七制加孔子大成之號祀以太牢
輦釋奠雅樂江南復戶四十肄之春秋二祀先期必命
大臣攝事皇帝御極陞先儒周敦頤程顥程頤司馬光
張載邵雍朱熹張栻呂祖謙許衡從祀廣弟子員為三
百進庶民子弟之俊秀相觀而善業精行成者歲舉從
政又詔天下三歲一大比興賢能于是崇寧峻陞陳器
服冕聖師巍然如在上教有業息有居親師樂友諸生
各安其學咸曰大哉天子之仁至哉相臣之賢工曹之
勤其知政治之本源矣 雪樓集
原吳澄賡侯修廟學頌 世祖皇帝既一天下作京城
于大興府之北其祖社朝市之位經緯塗軌之制宏規
遠謀前代所未有也至元二十四年設國子監命立孔

子廟暨順德忠獻王哈喇哈斯相成宗始克繼先志成其事而工部郎中賈侯董其役廟在東北緯塗之南北東經塗之東殿四阿崇十有七仞南北五尋東西十筵者三左右翼之廣亦如之衡達于兩廡兩廡自北而南七十步中門崇九仞有四尺修半之廣十有一步門東門西之廡各廣五十有二步外門左右為齋宿之室以間計各十有五神厨神庫南直殿之左右翼以間計各七殿而廡廡而門外至于外門內至於厨庫凡四百七十有八楹肇謨于大德三年之春訖功于大德十年之秋于時設官教國子已二十年矣寄寓官舍不正其名丞相以為未稱興文崇教之實也乃營國學于廟之西中之堂為監前以公聚後以燕處旁有東西夾夾之東西各一堂以居博士東堂之東西堂之西有室東室之東西室之西有庠庠之前為六館東西嚮以居弟子員一館七室助教居中以蒞之館南而東而西為兩塾以屬于門屋四周通百間踰年而成不獨聖師之宮巍然

為天下之極而首善之學亦偉然聳天下之望達邇來
觀靡不驚嘆嘆美其高壯宏敞蓋微丞相其孰能贊承
聖天子之德意而微賈侯亦孰能聞張賢宰相之盛心
哉侯名馴字致道濟南鄒平人至大四年三月朔國子
監丞吳敦叙詩曰於赫皇元澤彌八埏翼冀京師風
化攸先孔道昌明千古日月帝曰廟之以對先烈顯允
龐臣欽輔神孫祖訓是承往聖是遵相謂而馴而職而
職乃基乃構乃墁乃甃侯抵相言弗懈以處新宮巍巍
有卓具萬宮牖之而學宮爰作我宏爾居爾懋爾學爾
士來遊四方具瞻爾則非遙像貌聿嚴恂恂賈侯庀敷
克敏孰挫其蘆孰混其畛一正不阿百折不回旌斯糾
紛剏之恢恢廟學之崇天子之德丞相之功賈侯之力

吳文正集

原陳旅周子監營繕官舍記

至順三年春南陽富珠

哩先生以集賢直學士兼國子祭酒監有隙地在居賢
坊大德中有司議以建學餘力築屋以舍師儒不果也

明年五月以中統緒康二萬餘緡筮吉日籌工度費除
北坊北直為四區區各立屋五間中三間為居室旁兩
間為庫儲具饗之所宅之門以東西門之街以南北街
北距通衢立大門街南羨塹可藝蔬東浚井西置屋居
隸者使掌大門之管以贏資治舊宅二區之在坊中者
其西地甚易敗摘腐茨補以新瓦而墜塗之旁起屋如
北坊之制東宅西偏作室象舟可居琴書東南作見
賓之室曰賓以上六條原在卷七月初經始九月成安雅堂集
城南門今移改

臣等謹按陳旅記文稱富珠哩者乃富珠哩朮元
史本傳所載事蹟與此相同陳記中未及其名耳

原吳澄崇文閣碑國朝以神武定天下我世祖皇帝
以武之不可偏尚也廣延四方耆碩之彥與共謀議遂

能裨贊皇猷修舉百度文治浸浸興焉中統間命儒臣
教胄子至元間備監學宮成宗皇帝光紹祖烈相臣哈
喇哈斯欽承上意作孔子廟于京師御史臺言胄子之
教寄寓官舍隘陋非宜奏請孔廟之西營建國子監學
以御史府所貯公帑充其費逮至仁宗皇帝文治日隆
僉謂監學櫝藏經書宜得重屋以度有旨復令臺臣辦
集其事乃于監學之北構架書閣閣四阿檐三重度以
工師之引其崇四常有一尺南北之深六尋有奇束西
之廣倍差其深延祐四年夏經始六年冬績成材木瓦
甍諸物之直工役飲食之費一皆出御史府雄偉壯麗
煥然增監學之輝名其閣曰崇文英宗皇帝講行典禮
賁飾太平文治極盛矣臺臣請勒石崇文閣下用紀告
成之歲月制命詞臣撰文臣激次當執筆今上皇帝丕
纂聖緒動遵世祖成憲于崇儒重道惓惓也泰定元年
春誕降俞音國子監立碑如臺臣所奏臣激謹錄所撰
文以進臣聞若古有訓戡定禍亂曰武經緯天地曰文

武之與文各適所用然戡定禍亂用于一時而已經緯
天地則亘古亘今不可無也何也日月星辰天之文也
山川草木地之文也人文與天地相為經緯則亦與天
地相為長久而可一日無也哉我世祖忽忽用武日不
暇給而汲汲崇文惟恐或後此其高識深慮度越百王
宏規遠範垂示萬世以為聖子神孫法程夫豈常人所
能測知蓋創業之初非武無以弭亂守成之後非文無
以致治武猶毒藥之治病病除即止文猶五穀之養生
無時可棄也有文治之君必有文治之臣文治之臣苟
非教習之有其素彼亦惘然孰知文之所以為文者故
建學以興文教暢文風涵育其人將與人生共治也斯
文也小而修身齊家大而治國平天下言動之儀倫紀
之敘事物理義之則禮樂刑政之具凡燦然相接煥然
可述皆文也古聖賢用世之文載在方冊不攷古人之
所以用世不知今日之所以為世用者也然則聖朝之
崇文豈虛為是名也哉閭之所度古聖賢之文也立之

師使之以是而教設弟子員使之以是而學教之而成
學之而能則游居監學者濟濟然彬彬然人人聞于言
動之儀登于倫紀之叙博通乎事物理義之則詳究乎
禮樂刑政之具他日輔翊吾君躋一世文治于堯舜三
代之盛由此而選也夫如是其可謂不負聖天子崇文
之明命休德已若夫不能潛心方冊真有得于古聖賢
之所謂文而涉獵乎淺末炫耀乎葩華曾是以為文乎
上之所崇下之所以為世用者蓋不在是 吳文正

集

補蒲道源崇文閣上梁文

我瞻四方京師為首善之

地若稽三代國學為宣化之原皇帝發政施仁仰承祖
武右文尚德創設儒科政府揚休期大猷之是闡中臺
集議懼闕典之未興以為教胄子既有成均尊聖經可
無隙間欽承上旨大發積緡官不科需用咸資于素畫
農無妨作役盡募于閒民朝士程工梓人奏技前曉離
位後鎮坎宮雲漢昭回菁莪樂育園橋門之冠帶藏闕

里之詩書擇吉旦而舉虹梁協衆誠而修燕賀伏願上
梁之後朝廷寧謐禮樂興行洋洋萬世誦之音濟濟登

茹連之士間居震藻

原虞集國子監後園賞梨花樂府序至大庚戌之仲

春大成殿登歌樂成時雨適至我司業先生樂雅樂之
復古顧甘澤之及時於是乎賦喜雨之詩推本歸功於

成均之和迺三月辛巳國子監後園梨花盛開先生率
僚吏席林臺之上尊有醴盤有蔬肴藏雜陳勸酬交錯

飲且半命能琴者作古操一闕禽鳥翔舞雲風低迴先
生於是歌木蘭之引以寓斯文之至樂而詠聖澤之無

窮也明日僚友酌酒而廢之又明日諸生之長酌酒而
廢之氣和辭暢洋洋乎盛哉虞某起言曰古之教者必

以樂故感其心也深而成其德也易命大夫者猶與之
登焉賦詩而觀其能否茲事不聞久矣今吾師友僚佐

乃得以請簡之暇從容詠歌庶幾乎樂而不淫者亦成
均之義也命弟子緝錄為卷以貽諸好事可覽觀焉謹

序 道園學古錄

原陳礎登崇文閣歌 魏巍乎高哉崇文之閣兮吾不

知其幾百尺突兀直倚蒼雲中雕簷高飛近曉日瓊窓

洞啟來清風前瞻兮帝閣下顧兮辟雍京畿鬱兮千里

五雲近兮九重太行西來兮迤邐居庸北拱兮龍從峯

巖遠近其環峙削出衆衆金芙蓉是中奇勝甲天下何

況此地名儒宗圖書浩瀚紛英數文光夜吐猶晴虹漢

家天祿不可以復見幸喜斯閣之萬崇值校文之多暇

日從倚而從容愛扶輿磅礴之奇秀兮呼吸盡使歸心

曾闌干笑拍飛鳥上豪氣不減陳元龍俯視十二衢車

馬塵濛濛欲招太白老更約東坡翁葡萄酒傾瑪瑙甃

日醉三百玻璃鍾人間亦自有勝境何必飛度扶桑東

琴軒集

原來珙國子監吳倫堂前石罍詩 流沙迤邐隔溟渤

不取昆吾鑄奇物杏壇花間春晝遲帝遣良工琢山骨

圓如蒲壁巨如輪三尺瑤臺高捧雲子午南北已定位

度數要用羅星辰六堂深沉更漏早旭
日扶桑照林杪一絲影射白玉盤萬井
鐘聲報清曉先生盛服坐羣比猶記花朝
值直時寅賓出納著二典赤心只許歲和
知爰則晨昏造小子寸陰自惜勤終始期
在涓埃答主恩太朋教化同一以上五條
原在畧柳莊集城市門令移改

欽定日下舊聞考六十七